

PURMERU KARTA KU JON

SKIRBI

Introduson

Jon, ki disipulu ku Jesus amaba, skirbi e karta, talves serka di anu 90, dipus ki skirbi Bon Noba di Jesus. I tenba ja un nsinamentu falsu ku fala kuma, suma tudu kusa na mundu i mau, i kontaminadu, Jesus ka pudiba bin na kurpu di omi. Jon diklara kuma i obi fála di Jesus, i ojal ku uju, si mon toka nel, i tenba ligason ku Deus pabia di si Fiju, Jesus Kristu. I mistiba tambi pa kilis ku na lei e karta ten ki mesmu ligason. E ligason ku Deus i ta danu tambi ligason ku ŋutru, i ta judanu pa no yanda na lus di Deus.

Jon misti pa no ten sertesa di vida ku ka ta kaba (5.11-13). No SIBI kuma no kapli ja di mortu pa vida, pabia no ama no ermons (3.14). No dibi di SIBI kuma no sta na Deus, Deus sta na nos, pabia i danu si Spiritu (4.13). No SIBI kuma Deus amanu (4.16). Leitor de karta na oja manga di utru kusa ku no pudi SIBI.

Palabra di vida

1 ¹No na skirbi aserka di Palabra di vida ku tenba disna di kumsada. No obil, no ojal ku no uju, no jubil, no mon toka nel. ²Ki vida bin bida na manera ki pudi ojadu. Anos no ojal, no konta aserka del; no diklara bos ki vida ku ka ta kaba ku staba ku si Pape, ku no bin mostradu. ³Kil ku no obi, ku no oja, el ku no na konta bos, pa bo pudi junta ku nos na no ligason ku no Pape, ku si Fiju Jesus Kristu. ⁴No skirbi bos e kusas pa no alegria pudi sta kompletu.

Deus i lus

⁵Es i rekadu ki danu, ku no na konta bos, kuma Deus i lus. Nin sukuru ka sta nel. ⁶Si no fala kuma no sta ligadu ku el, ma no na yanda na sukuru, no na konta mintida ku no boka, ku no manera di yanda. ⁷Si no

na yanda na lus, suma ku el i sta na lus, no ta liga ku ŋutru; sangi di Jesus, si Fiju, i ta limpanu di tudu pekadu.

⁸Si no fala kuma no ka tene pekadu, no na ngana no kabesa; bardadi ka sta na nos. ⁹Si no konfesa no pekadus, suma el i justu, i di konfiansa, i ta purda no pekadus, i ta limpanu di tudu kusa mau, ¹⁰ma si no fala kuma no ka fasi pekadu, no na comal munturus. Si palabra ka sta na nos.

Kristu no Judadur

2 ¹Ña fijus, N na skirbi bos e kusas pa ka bo peka, ma si algin

1.1: Mik 5.2; Jon 1.1; Luk 24.39; 2 Ped 1.16

1.2: Jon 1.4,14 **1.3:** At 4.20 **1.3:** Jon 17.21;

1 Kor 1.9 **1.4:** Jon 15.11; 2 Jon 12 **1.5:** Jon 1.9; 8.12; 9.5; 12.35 **1.6:** 2 Kor 6.14 **1.7:** Ef 1.7; Eb 9.14

1.8: 1 Re 8.46; Ekl 7.20; Rom 3.23

1.9: Sal 32.5; Dit 28.13 **2.1:** Rom 8.34; 1 Tim 2.5; Eb 7.25; 9.24

fasi un pekadu, no tene un algin justu, ku sedu Jesus Kristu, ku ta difindi pa nos dianti di no Pape. ²I pabia di sakrifisiu di Kristu ku no pekadu pudi tiradu; i ka son di nos, ma di jinti di tudu mundu.

³Si no obdisi mandamentu di Deus, no ta sibi kuma no kunsil. ⁴Si algin fala kuma i kunsil, ma i ka obdisi si mandamentu, i munturus; bardadi ka sta nel. ⁵Kil ku obdisi si palabra, na bardadi, amor di Deus sta kompletu dentru del. Asin no ta sibi kuma no sta na Deus. ⁶Kil ku fala kuma i sta nel, i dibi di yanda suma ku Kristu yanda.

⁷Na kiridu ermons, i ka nobu mandamentu ku N na skirbi bos, ma i mandamentu antigu ku sempri bo tene disna di kumsada. E antigu mandamentu i palabra ku bo obi ja. ⁸Kontudu e mandamentu ku N na skirbi bos i nobu, si bardadi i ta ojadu na Kristu, tamba na bos, pabia sukuru na bai; lus di bardadi na numia.

⁹Kil ku fala kuma i sta na lus ma i nfastia si ermon, te gosi i sta na sukuru. ¹⁰Kil ku ama si ermon i sta na lus; i ka ten nada nel ku ta pui algin mbaransa, ¹¹ma kil ku nfastia si ermon i sta na sukuru; i na yanda na sukuru; i ka sibi nunde ki na bai, pabia sukuru segal uju.

2.2: Jon 1.29; Rom 3.25 **2.4:** Kap 1.6,8; 4.20
2.5: Kap 4.12-13; Jon 14.21,23 **2.6:** Jon 15.4-5
2.7: Kap 3.11; 2 Jon 5 **2.8:** Jon 13.34 **2.8:** Rom 13.12; Ef 5.8; 1 Tes 5.5 **2.9:** Kap 3.14-15 **2.11:** Jon 12.35
2.13: Kap 1.1; Jon 17.3 **2.14:** Sal 119.11; Jer 31.33; Jon 15.7 **2.15:** Rom 12.2; Tia 4.4 **2.16:** Kum 3.6; 6.2; Jos 7.21; Jo 31.1; Mat 5.29 **2.17:** Dit 10.25; 1 Kor 7.31; 1 Ped 1.24-25 **2.18:** Mat 24.5; 2 Tes 2.3; 2 Ped 2.1
2.19: 1 Kor 11.19; 2 Tim 2.19 **2.20:** Jon 14.26; 16.13
2.22: Kap 4.3

¹²Fijus, N na skirbi bos, suma ku bo pekadu purdadu pabia di nomi di Kristu. ¹³Papes, N na skirbi bos, pabia bo kungsi kil ku sedu disna di kumsada. Jovens, N na skirbi bos, pabia bo vensi ki malvadu.

Fijus, N skirbi bos, pabia bo kungsi no Pape. ¹⁴Papes, N skirbi bos, pabia bo kungsi kil ku sedu disna di kumsada. Jovens, N skirbi bos, pabia abos i forti; palabra di Deus sta na bos; bo vensi ki malvadu.

¹⁵Ka bo ama mundu nin kusas ku sta nel. Si algin ama mundu, amor di no Pape ka sta nel, ¹⁶pabia tudu ku sta na mundu, ku sedu kusas ku no kurpu ta dija, ku uju ta oja i misti, ku vida di ronku, es tudu i ka di no Pape, ma i di mundu. ¹⁷E mundu na pasa, ku tudu si disezus mau, ma kil ku na fasi vontadi di Deus i na fika pa sempri.

Inimigu di Kristu

¹⁸Na fijus, es i ora di kabantada. Suma ku bo obi kuma anti-kristu na bin, manga di anti-kristu parsi ja. Es ta mostranu kuma no sta ja na ora di kabantada. ¹⁹E sai na no metadi, ma e ka pertensinu, pabia si elis e seduba di nos e ta fikaba ku nos. E sai pa i pudi mostradu klaru kuma elis i ka di nos.

²⁰Deus darma Spiritu Santu riba di bos; bo ntindi tudu.

²¹I ka suma bo ka kungsi bardadi ku manda N na skirbi bos, ma pabia bo kunsil; tamba bo sibi kuma nin un mintida ka ta sai na bardadi. ²²Kin ki munturus si i ka kil ku nega kuma Jesus i Kristu? I el propi

ki anti-kristu, kil ku nega Pape ku Fiju. ²³Kil ku nega Fiju, tamba i ka tene si Pape. Kil ku seta Fiju, i tene tamba si Pape.

²⁴Asin, bo ten ku rakada na bo korson ki palabra ku bo obi disna di kumsada. Si bo rakada ki palabra, bo ta sta sempri na union ku Fiju ku si Pape. ²⁵Es i kusa ki fala i na danu: vida ku ka ta kaba.

²⁶N skirbi bos e kusa aserka di kilis ku misti ngana bos. ²⁷Spiritu Santu ku darmadu riba di bos i na fika ku bos. I ka pirsis pa algin nsina bos, pabia Spiritu ta nsina bos aserka di tudu kusas. El i bardadi; i ka ta konta mintida. Suma ki nsina bos, bo pega na Kristu.

²⁸Ña fijus, bo pega nel, pa ora ki bin, no pudi ten fiansa; no ka na fika ku borgoña si dianti dia ki bin. ²⁹Si bo sibi kuma el i justu, bo sibi kuma tudu kin ku ta fasi kusa diritu i si fiju.

Fijus di Deus

3 ¹Bo oja garandi amor ku no Pape mostranu, pa no comadu fijus di Deus. Asin ku no sedu na bardadi. E ku manda jinti di mundu ka kunsinu, pabia e ka kunsil. ²Ña kiridu ermons, gosi no sedu fijus di Deus; ke ku no na bin sedu i ka klaru inda, ma no sibi, ora ku Kristu bin, no na sedu suma el, pabia no na ojal manera ki sedu. ³Tudu ku ten e speransa nel, i dibi di limpa si vida, suma ku el i limpu.

⁴Tudu kil ku fasi pekadu i ta kebra lei di Deus, pabia pekadu i ora ku bu kebra lei. ⁵Bo sibi kuma

Kristu bin pa tira no pekadus. El i ka tene pekadu. ⁶Tudu algin ku sta nel i ka ta peka, ma tudu kil ku na peka i ka ojal, nin i ka kunsil.

⁷Ña fijus, ka bo disa ningin ngana bos. Kil ku ta fasi kusas diritu, ki algin i justu, suma ku Kristu i justu. ⁸Kin ku ta fasi pekadu i di diabu, pabia diabu peka disna di kumsada. I pa e fin ku Fiju di Deus bin, pa kaba ku kusas ku diabu fasi. ⁹Kil ku padidu na familia di Deus ka ta fasi pekadu, pabia simentera di Deus sta nel. I ka pudi kontinua na pekadu, pabia i padidu na familia di Deus. ¹⁰I es ku ta mostra fijus di Deus ku fiju di diabu: Kil ku ka ta fasi kusas diritu, ku ka ama si ermon, i ka di Deus.

Amor pa ñutru

¹¹Palabra ku bo obi disna di kumsada i es, pa no ama ñutru. ¹²I ka suma Kain ku seduba di ki malvadu, i mata si ermon. Ke ku manda i matal? I pabia i ta fasi kusas mau; si ermon ta fasi kusas bon.

¹³Ña ermons, ka bo dimira si jinti di mundu nfastia bos. ¹⁴No sibi kuma no kapli ja di mortu pa vida, pabia no ama no ermons. Kin ku ka ama si ermon i sta inda na mon di mortu. ¹⁵Kil ku nfastia si ermon i

2.23: Jon 14.7; 15.23; 2 Jon 9 **2.24:** Kap 1.3; Jon 14.23

2.25: Kap 5.11; Jon 17.3 **2.26:** Kap 3.7; 2 Jon 7

2.27: Is 54.13; Jon 16.13 **2.29:** Kap 3.7,10; At 22.14

3.1: Jon 1.12; Rom 8.15; Gal 3.26 **3.2:** Sal 17.15;

Rom 8.29; 1 Kor 2.9; 13.12 **3.5:** 2 Kor 5.21; 1 Tim 1.15

3.6: Kap 2.4; 3 Jon 11 **3.7:** Kap 2.29; Rom 2.13

3.8: Mat 13.38; Jon 8.44 **3.8:** Kum 3.15 **3.9:** Kap 5.18;

Jon 1.13; 3.3 **3.10:** Kap 2.29; 4.8 **3.11:** Kap 2.7; 4.7,21;

Jon 13.14 **3.12:** Kum 4.4-5,8 **3.13:** Jon 15.18-19

3.14: Kap 2.9-11 **3.15:** Mat 5.21-22; Apok 21.8

matadur. Bo sibi kuma nin un matadur ka tene vida ku ka ta kaba. ¹⁶I es ku manda no sibi ke ki amor, suma ku Kristu da si vida pa nos. Anos tamba no dibi di da no vida pa no ermons. ¹⁷Kin ku sta ben ne mundu, i oja si ermon ku falta, i fi-ca si korson pa el, kuma ki pudi fala kuma amor di Deus sta nel? ¹⁸Ña fijus, ka no ama son ku palabra di boka, ma no ama na bardadi ku kil ku no na fasi.

Fiansa na Deus

¹⁹De manera no ta sibi kuma no sta na bardadi, no ta pui no korson diskansadu danti di Deus. ²⁰Si no korson na kondenanu, no sibi kuma Deus i mas garandi di ki no korson. El i sibi tudu kusa. ²¹Ña kiridu ermons, si no korson ka kondenanu, no fiansa danti di Deus. ²²Kualker kusa ku no pidil, no na risibi, pabia no obdisi si mandamentu, no ta fasi kil ki misti. ²³Es i si mandamentu, pa no fia na nomi di si Fiju Jesus Kristu, pa no ama ntru suma ki manda. ²⁴Kin ku obdisi si mandamentu i sta na Deus; Deus sta nel. Es ku ta pui no sibi kuma i sta na nos, pabia di Spiritu ki danu.

3.16: Jon 3.16; 15.12-13; Rom 5.7-8; Ef 5.2,25

3.17: Lei 15.7-8; Luk 3.11 **3.18:** Rom 12.9; Ef 4.15

3.19: Jon 14.6; 18.37 **3.20:** 1 Kor 4.4 **3.21:** Eb 10.22

3.22: Kap 5.14; Sal 34.15; Dit 15.29; Mat 21.22; Jon 15.7;

Tia 5.16 **3.23:** Jon 6.29; 13.34 **3.24:** Jon 14.23;

Rom 8.9 **4.1:** Jer 29.8; 1 Kor 14.29 **4.2:** Kap 5.1;

1 Kor 12.3 **4.3:** 2 Jon 7 **4.4:** 1 Kor 2.12 **4.5:** Jon 3.31

4.6: Jon 8.47; 10.27; 1 Kor 14.37 **4.7:** Kap 3.11

4.8: Sai 34.6-7 **4.9:** Rom 5.8 **4.11:** Kap 3.16;

Jon 15.12-13

Anunsiaduris falsu

4 ¹Ña kiridu ermons, ka bo fia na tudu jinti ku fala kuma e tene Spiritu di Deus, ma bo proba elis pa jubi si na bardadi ki spiritu bin di Deus, pabia i ten manga di anunsiadur falsu ku lanta na mundu. ²Asin ku bo ta pudi rapara si i Spiritu di Deus: Tudu algin ku fala klaru kuma Jesus Kristu bin suma omi, i tene Spiritu di Deus. ³Tudu kil ku nega konta kuma Jesus Kristu bin suma omi, spiritu ki tene i ka di Deus, ma i spiritu di anti-kristu, kil ku bo obi faladu i na bin bin; gosi i sta ja na mundu.

⁴Ña fijus, abos bo sedu di Deus, bo vensi ki anunsiaduris, pabia kin ku sta na bos i mas ki algin ku sta na jinti di mundu. ⁵Elis i di mundu; e ku manda e ta papia kusas di mundu; mundu ta obi elis. ⁶Anos i di Deus. Kin ku kungsi Deus i ta obinu. Kin ki ka di Deus ka ta obinu. Asin ku no ta kungsi Spiritu di bardadi ku spiritu ku ta yara.

Deus i amor

⁷Ña kiridu ermons, no ama ntru, pabia amor i di Deus. Tudu kil ku ten amor i fijus di Deus; i kungsi Deus. ⁸Kil ku ka ten amor i ka kungsi Deus, pabia Deus i amor. ⁹Deus mostra si amor pa nos suma ki manda si un Fiju son pa mundu pa no pudi tene vida pabia del. ¹⁰Es i amor; i ka kuma no ama Deus, ma i el ku amanu, i manda si Fiju pa no pekadu pudi tiradu pabia del. ¹¹Ña kiridu ermons, si Deus amanu de manera, no dibi di ama ntru

tambi. ¹²Ningin ka ciga di oja Deus, ma si no ama ñutru, Deus sta na nos; si amor sta kompletu na nos.

¹³No sibi kuma no sta na Deus, Deus sta na nos, pabia i danu si Spiritu. ¹⁴No oja, no konta kuma Deus no Pape manda si Fiju pa i sedu Salbadur di mundu. ¹⁵Kil ku konta klaru kuma Jesus i Fiju di Deus, Deus sta nel, el i sta na Deus. ¹⁶No sibi kuma Deus amanu; tambi no fia na si amor.

Deus i amor. Kil ku sta na amor i sta na Deus; Deus sta nel. ¹⁷Amor i kompletadu na nos pa no pudi ten fianza na dia di juisu, pabia suma ku Jesus sedu, asin ku no sedu tambi ne mundu. ¹⁸Medu ka sta na amor, ma un amor kompletu i ta tira medu fora, pabia medu liga ku kastigu. Kin ku ten medu, si amor inda ka sta kompletu.

¹⁹No ama pabia i amanu purmeru. ²⁰Si algin fala kuma i ama Deus, ma i nfastia si ermon, i munturus, pabia kil ku ka ama si ermon ki oja, kuma ki pudi ama Deus ki ka oja? ²¹E mandamentu, i Kristu ku danu el, kuma kin ku ama Deus, pa i ama tambi si ermon.

Fe na Fiju di Deus

5 ¹Tudu kil ku fia kuma Jesus i Kristu i fiju di Deus. Tudu kil ku ama un pape, i ta ama tambi si fiju. ²I ne manera ku no ta sibi kuma no ama fijos di Deus, si no ama Deus, no obdisi si mandamentus. ³No amor pa Deus ta mostra na manera ku no ta obdisi si mandamentus. Si mandamentus gora, nin e ka

kansadu, ⁴pabia tudu fiju di Deus ta vensi mundu. Vitoria ku vensi mundu i no fe. ⁵Nta kin ku vensi mundu si i ka kil ku fia kuma Jesus i Fiju di Deus?

Tustumuñu aserka di Jesus Kristu

⁶Es i kil ku bin ku yagu ku sangi, ku sedu Jesus Kristu. I ka bin son ku yagu, ma ku yagu ku sangi. I Spiritu ku ta konfirma e kusa, pabia Spiritu i bardadi. ⁷I ten tris ku ta da tustumuñu, [na seu: Pape, Palabra ku Spiritu Santu. E tris e sedu un son. I ten tris ku ta testifika na tera] ⁸ku sedu Spiritu, yagu ku sangi. E tris ta konkorda. ⁹No ta seta tustumuñu di omi, ma tustumuñu di Deus i mas forti. Tustumuñu di Deus i es ki da aserka di si Fiju. ¹⁰Kin ku fia na Fiju di Deus i tene e tustumuñu dentru del. Kin ku ka fia na Deus, i na comal munturus, pabia i ka fia na tustumuñu ki da di si Fiju. ¹¹Es i ki tustumuñu, kuma Deus danu vida ku ka ta kaba; e vida sta na si Fiju. ¹²Kin ku tene Fiju i tene vida. Kin ku ka tene Fiju di Deus i ka tene vida.

¹³N na skirbi e kusas pa bos ku fia na nomi di Fiju di Deus, pa bo sibi kuma bo tene vida ku ka ta kaba.

4.12: Jon 1.18 **4.13:** Kap 3.24; Rom 8.9-17

4.14: Jon 1.14; 3.17 **4.15:** Kap 5.1,5; Rom 10.9

4.16: Kap 3.24 **4.17:** Kap 2.28; 3.21 **4.20:** Kap 2.4; 3.17 **4.21:** Mat 22.37-39; Jon 13.34 **5.1:** Kap 4.15;

Jon 1.12-13 **5.3:** Jon 14.15,21,23; 2 Jon 6

5.4: Jon 16.33; 1 Kor 15.57 **5.6:** Jon 19.34

5.6: Jon 14.17; 15.26; 16.13 **5.9:** Mat 3.16-17;

Jon 8.17-18 **5.10:** Jon 3.33; Rom 8.16; Gal 4.6

5.11: Jon 1.4 **5.12:** Jon 3.36 **5.13:** Kap 1.2; Jon 20.31

Puder di orason

¹⁴Es i fiansa ku no ten nel, kuma, si no pidi un kusa na si vontadi, i na obinu. ¹⁵Si no sibi kuma i obinu na tudu ku no pidil, no ta sibi tambu kuma no risibi kil ku no pidil.

¹⁶Si algin oja si ermon na fasi un pekadu ki ka pa mortu, i ta pidi Deus; Deus ta dal vida. Ma i son pa kilis ku fasi pekadu ki ka pa mortu. I ten pekadu ki pa mortu; N ka fala pa bo ora pa el. ¹⁷Tudu kusa mau ku algin fasi i pekadu, ma i ten pekadu ki ka pa mortu.

¹⁸No sibi kuma tudu kil ku pa didu na familia di Deus i ka ta fasi pekadu, pabia Fiju di Deus ta guardal; ki malvadu ka ta toka nel. ¹⁹No sibi kuma no sedu di Deus, ma tudu mundu sta bas di puder di ki malvadu. ²⁰No sibi kuma Fiju di Deus bin ja, i danu ntindimentu pa no kungsi Deus ki di bardadi. No sta na kil ki di bardadi, ku sedu si Fiju Jesus Kristu. Es i Deus di bardadi; i vida ku ka ta kaba.

²¹Ña fijus, bo libra di idulus.

5.14: Kap 3.22 **5.16:** Jo 42.8; Tia 5.15-16
5.16: Mat 12.31-32; Eb 6.4-6; 10.26 **5.18:** Kap 3.9;
 1 Ped 1.23 **5.20:** Luk 24.45; Jon 17.2 **5.20:** Is 44.6;
 54.5; Rom 9.5; Titu 2.13; Eb 1.8 **5.21:** 1 Kor 10.14